

Inatsisartut suleriaasiat § 33 naapertorlugu Inatsisinut Ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

**Inatsisartut Ombudsmandiata 2020-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersut.**

(Inatsisinut Ataatsimiititaliaq)

**Tunngavilersuut:**

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilerpaat. Taamaalilluni Ombudsmandi Inatsisartut Naalakkersuisunik nakkutilliinerannut sakkuvoq, kisiannili aamma nunap innuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ombudsmandip 2020-mut ukiumoortumik nalunaarusiaani – maannamut pisarnertut – suliat arlallit malittarisassatut tunngavimmi namminerimi imaluunniit malittarisassat allaffissuutigineranni kukkunerit amigaatillu nalunaarutigineqarsimasut ilanngunneqarsimapput.

Ukiuni kingullerni Ukiumoortumik Nalunaarutit aamma, ajornartorsiutit minnerunngitsumik oqartussaasunut Inatsisartunullu soqutiginaateqartut pillugit, allaaserisanik ataasiakkaanik imaqartarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorneqarsinnaavoq.

Ukiumoortumik nalunaarutip saqqummiunneqannginnerani Inatsisinut Ataatsimiititaliaq Ombudsmandimik ataatsimeeqateqarpoq. Ataatsimiinnermi tassani Inatsisartut Ombudsmandiata ukiumoortumik nalunaarusiaata imarisaasa ilai ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Innuttaasunit kommunimit itigartinneqarsimasunit saaffiginnissutinik akulikitsumik tigusaqartarluni Ombudsmandip 2019-imut ukiumoortumik nalunaarutimini ilisimatitsissutigaa. Suliat taamaattut ilaanni amerlasuuni innuttaasoq, tamatuminnga erseqqissumik qinnuteqarsimagaluarluni aalajangiineq pillugu allakkatigut ilisimatitsissummik tigusaqartarsimangilaq.

Aalajangiinerit innuttaasumut tamakkiisumik tapersiinnngitsut innuttaasup tamanna qinnutigippagu innuttaasumut allakkatigut tunngavilersuummik ilaqartillugit

ilisimatitsissutigineqarnissaannik suliassat suliarineqartarnerat pillugu inatsimmi piunasaqaammik kommunit naammassinnittannginnerat suli siamasissumik ajornartorsiutaasoq Ombudsmandip 2020-mut nalunaarummini ilisimatitsissutigigaa Inatsisinut Ataatsimiititaliamit maluginiarneqarpoq. Tamanna naak Ombudsmandi tamatumunnga malittarisassanik nunami borgmesterinut allakkatigut erseqqissaateqarsimagaluartoq.

Suliassat suliarineqartarnerat pillugu inatsimmi malittarisassat pineqartut maanna ukiut 25-t sinnerlugit atuutereersimalersut, suliassallu suliarineqartarnerat pillugu inatsimmi malittarisassat pisariinnerpaat tunngaviunerpaallu ilagigaat Inatsisinut Ataatsimiititaliamit oqaatigineqassaaq. Taamaammatt suli malittarisassanik taakkuninnga malinnissinnaanngitsunik kommuneqarnera pillugu isumakuluuteqarnissamut Inatsisinut Ataatsimiititaliaq tunngavissaqarpoq.

Peqatigitillugu Inatsisinut Ataatsimiititaliamit paasineqarpoq malittarisassanik taakkuninnga malinninneq innuttaasut ingerlatsinermik tatiginnissinnaanerat eqqarsaatigalugu annertuumik pingaaruteqarsinnaasoq: Allakkatigut aalajangiineq tunngavilersugaq aalajangersakkanut aalajangiinnermut tunngaviusunut innersuussutitalik, aalajangiinerup innuttaasumut tapersiinnnginneranut (imaluunniit tamakkiisumik tapersiinnnginneranut) tunngaviusumik paasinninnissamut, aalajangiinerullu eqqortuuneranik paasiniaanissamut innuttaasumut periarfissiisoq.

Inatsisinut Ataatsimiititaliap isumaqatigiittup taamatut oqaaseqarluni Inatsisartut Ombudsmandiata 2020-imut nalunaarutaa pillugu siunnersuut Inatsisartunit tusaatissatut tiguneqartussanngorlugu saqqummiuppaa.

Ilanngulluguttaaq Inatsisartut Ombudsmandiannut 2020-imi suliai pillugit Inatsisinut Ataatsimiititaliaq qujassuteqassaaq.